

ten ohrt/ morgens vnd abends/ da du wilt Haar haben/ so werden daselbst bald viel Haar wachsen/ vnd nit bald aufffallen/ du solt aber das Haupt zuvor mit solcher Laugen abwaschen: Nim Laugen von Rebenaschen gemacht/ kochte darinnen Capillum Veneris, Agrimonien, Ephem/ ana ʒ. M. darnach seige vnd behalt die Lauge bedeckt/ vnd wenn du das Haupt 2. oder 3. mal alle Wochen gewaschen/ vnd wiederumb getrocknet/ vnd mit obgenandter Salben geschmiret/ so wachsen die Haar in grosser menge vnd lang/ vnd stehen fest. Wenn du das Eydexenöl nicht hast/ magstu es auff solche weise bereiten. Nim grüne lebendige Eydexen/ kochte sie in Baumöl/ biß sie zerfallen/ setze es darnach 14. oder 20. Tage an die Sonnen/ so ist es gut.

Haar wachsen machen an welchem ohrt du wilt?

Nim jetzt gedachter Heydixen oder Meerfrösche/ schneide inen die Köpffe vnd schwänze ab/ dörre sie in in einem Backofen/ stosse sie zu Pulver/ mische darunter Eyeröl/ schmiere die kahle statt damit/ so gewinnestu daselbst in kurzer zeit Haar.

Item/ nim Eberesfenkraut/ zu Aschen gedranet/ vnd mit Wunderbaum/ oder Rettichöl vermengt/ vnd damit bestrichen/ ist gut für das Haar aufffallen/ auch das Kinn damit bestrichen/ machet den Wahrt sehr/ vnd schnell wachsen.

Item/ nim drey lebendige Frösche/ brenne sie in einem Hasen Pulver/ temperier es mit Honig/ salbe damit den ohrt/ da du wilt Haar haben/ so wachsen in kurzer Zeit viel Haar daselbst.

Item/ nim Leinsamen/ verbrenne ihn zu Aschen/ temperier es mit Baumöl/ schmiere damit den Ohrt.

Item/ nim gute Hauptlaugen/ kochte darinnen frisch Venushaar/ Mirabolana emblica, Citronen/ vnd Pomrankenrinden/ wasche damit das Haupt/ so wechslet das Haar.

E 3

Oder